

EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA



VASEGA MATUTUA FAAPITOA



AUKUSO - TESEMA

XXXXXXXXXXXXXXXXXXXXXXXXXXXXXXXXXXXX

2026

SAUNIA : OFISA O A'OA'OGA KERISIANO

TUSI AOGA VASEGA MATUTUA FA'APITOA
FA'ASOLOGA O MATAUPU O LE TUSI.
MATAUPU

ASO/MASINA

TUSI FAITAU

1.Fepuari 01, 2026	“Igoa – Valaauina”	Isaia 43:1-7
2.Fepuari 08, 2026	“Ta’utinoga fa’amaoni a Ruta”	Ruta 1:1-18
3.Fepuari 15, 2026	“Toe omai fa’atasi”	Salamo 133
4.Fepuari 22, 2026	“SUEGA FA’AMANATU”	
5.Mati 01, 2026	“O le mana o le Talalelei”	Roma 1:1-17
6.Mati 08, 2026	“Malaia mai le Fa’atoaga”	Kenese 3:8-24
7.Mati 15, 2026	“O fea lou fa’asinomaga”	Teuterenome 6:1-12
8.Mati 22, 2026	“Aga’i i le pogisa”	Mataio 16:21-28
9.Mati 29, 2026	“Malosi ma le Auai”	Mataio 26:47-56
10.Aperila 05, 2026	“E moni le Toetu”	Mataio 28:1-20
11.Aperila 12, 2026	“O le laulaufaiva mimita”	Salamo 12:1-4
12.Aperila 19, 2026	“O uiga fa’amaualuga”	Ioane 7:40-52
13.Aperila 26, 2026	“SUEGA FA’AMANATU”	
14.Me 03, 2026	“Saili le mapusaga mo lou loto”	Mataio 11:20-30
15.Me 10, 2026	“Ua le mautonu Mose”	Esoto 4:1-17
16.Me 17, 2026	“Aperamo”	Kenese 12:10-20
17.Me 24, 2026	“O le Agaga Paia”	Tito 3:3-8
18.Me 31, 2026	“MATAUPU FA’AMANATU”	
19.Iuni 07, 2026	“Omai nei, tatou mafaufau”	Isaia 1:10-20
20.Iuni 14, 2026	“O latou, ae le o Tatou”	Isaia 10:1-4
21.Iuni 21, 2026	“Galueaina”	Iona 4:1-11
22.Iuni 28, 2026	“SUEGA FA’AI’U”	

TUSI AOGA ASO SA VASEGA MATUTUA FA'APITOA

ASO SA FEPUARI 01, 2026

MATAUPU: "IGOA - VALA'AUINA" (Name – calling)

TUSI FAITAU: Isaia 43: 1-7

SINI: Ia malamalama le fanau, o le Atua na te fa'amamaluina o tatou igoa i lona suafa paia, atoa ai ma o tatou valaauina ese'ese.

FESOASOANI MO FAIAOGA:

I le suafa manumalo o lo tatou Alii o Iesu Keriso, e fa'afeiloa'i atu ai ma ofoalofa atu i a outou susuga i Fa'afeagaiga ma Faletua, fa'apea le mamalu o Faiaoga Aso Sa. Talitonu i le alofa ma le agalelei o le Atua o lo'o manuia i tatou uma. Manatu foi ua maua se malosi fa'asili mai le malologa sa feagai ai, ae a le amataina o a tatou galuega o lenei foi tausaga ua tatou aulia mai ma le manuia. O le tatou valaauina mo lenei galuega, e ao lava ona tatou galulue fa'atasi e tusa ai o le fa'atinoina o tatou tiute tauave. O le fa'amanatu lava, o le lava o lou taimi e su'esu'e ai ma faitau le tusi faitau, e nanea ma faigofie ai le fa'amatalaina o le mataupu.

SINA FESOASOANI MO LE MATAUPU:

O le tatou tusi faitau o lenei taeao, o lo'o palasi i le vaega e lua e tusa ai ma le vaevaeina o le tusi lenei o Isaia i se isi va'aiga i le tusi atoa. O lona uiga, pe a fua i ai e tusa ai ma lea va'aiga pe a faitauina le tusi o Isaia, o lo'o taoto le mataupu lenei i le vaega e lua, i le taimi ua fa'atafea ai le nu'u o le Atua i Papelelania. O le feau atoa a le perofeta o Isaia, o le feau fa'amafanafana, o upu fa'alototele ma upu tima'i mo Isaraelu, le nu'u na vala'auina e le Atua latou te osifeagaiga. O le feau mo le Isaraelu ua galo le Atua, a'o le toe fa'amanatu ina ia o latou manatua le na vala'auina i latou.

Ua fetalai le Atua e ala atu ia Isaia, na ou faia oe Iakopo e, na ou faia oe Isaraelu e, aua le fefe, aua ua ou fa'atauina oe, ua ou valaauina oe i lou lava igoa, e faia oe mo'u. O lona uiga, o le feau fa'alototele mo Isaraelu, a o'o ina tutupu pefea ma puapuaga ia te outou, ia outou manatua le Atua na valaauina outou. O ia na te lavea'iina ma fa'aolaina outou mai faigata e feagai i la outou savaliga. O le uiga lea o upu, a e sopoia atu vaitafe, e le lofia ai oe, a e savali i totonu o le afi, e le mu ai oe; e le susunuina foi oe i le mumu o le afi. O le ata o le Atua lavea'i ma le Atua alofa, a'o le fa'ailoga o fa'afitauli e tutupu pea i le savaliga a le tagata. O lo'o fa'amatala e ia mea le mamalu ma le paia o le Atua, e ao lava ona tau'ave e le tagata. O mea uma foi e faia e le tagata i le suafa o le Alii, e faia ina ia viia ai le Atua.

O le igoa na valaauina ai e le Atua lona nu'u, o Iakopo lea na suia mai ai ia Isaraelu. O Aperamo, Isaako ma Iakopo, o auga Tama ia na osi feagaiga ma le Atua i le amataga, e fai oe Isaraelu mo'u nu'u, ae fai A'u (Atua) ma outou Atua. O le vala'auina lea o Isaraelu e le Atua, e le fa'avaitaimi pe fai nei ae uma taeao, e leai, e fa'avavau. Tusa lava pe femoumoua'i tagata o lona nu'u, ae tumau pea le Atua i lana feagaiga. A o uiga ia o le Atua lea tatou te fa'atuatua ma talitonu i ai. Po'o a lava o tatou fa'aletonu, po'o le a le tatou le usita'i, o a foi o tatou uiga leaga e faia i lea aso ma lea taimi, e tumau pea lona alofa mo i tatou.

Tamaiti, o le feau fa'amanatu foi lea mo tatou le fanau, e tofua lava tatou ma o tatou valaauina mai le Atua. O le ala foi lea e naunau ai matua e ave tatou i le aoga, ina ia saili le poto ma fa'alautele le iloa ma ia tau lau o lou fa'amoemoe i le lumana'i. O uiga o le Atua, e auala mai i o tatou matua, o lou le usita'i i matua, o lou le usita'i lava lea i le Atua. O le mafua'aga foi lea po'o le a lava le le usita'i ma le le fa'alogi o outou i matua, ae alofola lava ia te outou le fanau. A ia outou iloa, o le tama ma le teine e usiusita'i i ona matua, e fa'amanuiaina e le Atua lona olaga i le lumana'i. E tele foi lu'itau ma fa'afitauli e feagai ma tatou, ae le mafai ona tu'ulafoa'iina i tatou e le Atua.

GALUEGA FA'ATINO: Fa'atumu avanoa i upu nei.

susunuina, Atiope, Faaola, sopoia, Sepa, lofia, togiola, vaitafe, Paia, savali, Aikupito, afi.

A e _____ atu le vai, ou te ia te oe; a e sopoia atu _____, e le _____ ai oe; a e _____ i totonu o le afi, e le mu ai oe; e le _____ foi oe i le mumu o le _____. Aua o a'u o le Alii lou Atua, o le _____ o Isaraelu, lou _____; na a'u avatua _____ e fai mou _____, o _____ ma _____ e sui a'i oe.

A'OA'OGA:

1. Ia e iloa o lo'o ia te oe le Paia o le Atua, ia e fa'aeteete ona fai.
2. Fa'ataua o tatou valaauina.
3. O le Atua na te lavea'iina ma fa'aola i tatou.
4. E le tu'ulafoa'iina tatou e le Atua.

PESE: Le Alii e, le Atua e, le fai mea e mafai. (Pese ma Viiga)

Ia fa'amanatu i le vasega mea nei, Api, Peni ma le Tusi Paia, ia ta'u foi i tamaiti le tusi faitau o le mataupu o lumana'i, o le galuega e fai i le fale o le faitau. Ia saunia e le faiaoga se tatalo e faai'u ai le vasega.

IA MANUIA SAUNIGA O LE ASO SA!!

ASO SA FEPUARI 08, 2026

MATAUPU: "TA'UTINOFA FA'AMAONI A RUTA" (Ruth's loyalty and commitment)

TUSI FAITAU: Ruta 1:1-18

SINI: Ia a'oa'o tamaiti, e taua le fa'amaoni ia outou ta'utinoga e pei foi o Ruta ma lana ta'utinoga.

FA'AMANATU MO FAIAOGA:

Talofa lava, malo le soifua manuia, talitonu i le alofa o le Atua ua tatou maua fa'atasi le aso fou e ala i lana tausiga i lo outou soifua ma lo tatou ola. Fa'afetai foi i le ola ma le malosi mai le Atua, e mafai ai pea ona fa'aauau feau ma galuega o lo'o feagai ma tatou. Fa'amalo lava le galulue e tusa ma lo outou valaauina. Ae o le taugologolo lava e tupu ai manatu aua la tatou galuega, o le tusi faitau lava, ia lava sou taimi e su'esu'e ma faitau i ai.

FA'ASOA MO LE MATAUPU:

O le tala i le ulugalii mai Peteleema o Iuta, o Elimeleka le Tama, a'o Naomi le Tina atoa ai ma le la fanau tama e to'alua, o Ma'alona ma Kilion. Fai mai o le taimi na oge ai le nu'u, na o ai Elimeleka ma lona aiga uma ua nonofo i le nu'u o Moapi. Ina ua oti Elimeleka, na totoa ai lea o Naomi ma lana fanau tama e to'alua. Ua fai ta'ito'alua uma i la'ua i fafine Moapi, o igoa o fafine o Orepa ma Ruta. Sa nonofo pe a ma le sefulu tausaga, ona oti foi lea o Ma'alona ma Kilion e fanau tama a Naomi. Ona totoa lea na o Naomi ma fafine Moapi, o ta'ito'alua o lana fanau tama. Ina ua logo tala Naomi ua asiasi le Alii i lona nu'u, ma foa'i mea'ai ma ua toe maua fa'amanuia. Ona toe foi lea o Naomi i lona nu'u o Iuta, atoa ai ma ta'ito'alua a lana fanau tama e to'alua.

Manatua, o Orepa ma Ruta, o fafine Moapi a o lea na o fa'atasi ma Naomi ina ua toe foi i lona nu'u. Peita'i, e le'i faigofie ia Naomi lo latou o ma fafine nei, o lea na ia talanoa loa i ai, e sili ona la foi atu ta'itasi i le aiga o lona Tina, ma ia agalelei le Alii ia te oulua. E le'i faigofie foi ona talia e Orepa ma Ruta upu a Naomi ia la'ua, ma la tali atu i ai, tatou te foi atu lava ma oe i lona nu'u. Na finau pea Naomi ma le alofa i a'i la'ua, ina ia toe foi e leai se aoga latou te o ai e le toe maua ni tama i lona manava ua ia matua foi. Na i'u lava ina toe foi Orepa i lona nu'u ma ona atua e pei ona fai atu ai Naomi le Tina o lona to'alua.

A o i na fai ai loa le ta'utinoga a Ruta ia Naomi e pei ona i ai le tatou mataupu o lenei aso. Fai mai Ruta ia Naomi, 'Aua e te finau ia te a'u ina ia ou tu'ulafoa'i ia te oe, ia le mulimuli atu ia te oe; aua o le mea e te alu i ai, ou te

alu ai foi; o le mea e te nofo ai, ou te nofo ai, e fai lou nu'u mo'u nu'u; e fai lou Atua mo'u Atua; o le mea e te oti ai, ou te oti ai, e tanu ai foi a'u; ia fa'apea ona faia e le Alii ia te a'u, ma ia fa'aopoopo i ai, pe afai e tu'ueseeseina i taua ma oe i se tasi mea se'i vagana le oti.' O le fa'amaoni o le alofa o Ruta ia Naomi, o lo'o aumai ai le ata o le alofa fa'amaoni o le Atua, le alofa e tumau tusa lava po'o a uiga femoumoua'i o le tagata. E le'i fa'apito le vaai a Ruta ia Naomi pe mafaufau foi e le'o sona Tina moni, ae na ia tausilava ma le fa'amaoni i ai.

E a'oa'o mai pea lenei tala mo tatou, aua o le ta'utinoga fa'amaoni a Ruta, o lo'o fa'amatala ai le Atua alofa na te le tu'ulafoa'iina i tatou o lana fanau. E le fa'atuaioia foi lona alofa, ae tutusa tagata uma i lana silafaga paia. Na te fa'amanuia foi i le tagata e fa'amaoni i ana ta'utinoga e fai e pei o Ruta ia Naomi. Ioe, po'o a lava a tatou ta'utinoga e fai, ia tatou savavali ai foi ma fa'atino ma le fa'amaoni, ona fa'amanuia mai lea o le Atua i a'i tatou.

GALUEGA FA'ATINO: Fesili fa'atupu manatu

1. O ai le igoa o le to'alua o Naomi?

Tali: O Elimeleka

2. A o ai igoa o lana fanau tama?

Tali: O Ma'alona ma Kiona

3. O fea le nu'u e omai ai lea aiga?

Tali: O Peteleema

4. Aisea na o 'ese ai lea aiga mai lo latou nu'u ae o atu i Moapi?

Tali: Ona ua oge le nu'u

5. O le a le uiga o le tala a Naomi na fai i lona nu'u, 'Aua tou te ta'ua a'u o Naomi, a ia ta'ua a'u o Mara?

Tali: Aua ua oona mea na faia ia te a'u e Le ona le malosilava uma lava.

Fa'afetai tele mo le galuega o lenei Aso Sa, ia ta'u i le vasega le tusi faitau o le mataupu o le Aso Sa o lumana'i. Ia saili ane se pese efetaui ma le mataupu ma fa'ai'u le vasega i le tatalo.



ASO SA FEPUARI 15, 2026

MATAUPU: "O LE LOTOGATASI (Unity is)

TUSI FAITAU: Salamo 133

SINI: Ia a'oa'o pea tamaiti, i le taua o le lotogatasi ma le nonofo fealofani, aua o le finagalo lea o le Atua mo tagata uma.

FESOASOANI MO FAIAOGA:

Fa'afeiloa'i atu foi i lenei taeao fou, maualuga pea le viiga i le Atua ona o lana tausiga i lo tatou ola. Fa'amalo foi le fa'amalolosi i feau ma galuega o lo'o feagai pea ma tatou ta'ito'atasi, manatu lava o lo'o gasologa lelei mea uma e ala i le fesoasoani mai o le Agaga o le Atua ia i tatou uma. Ae le tuua lava le fa'amanatu ina ia tautuana lau tapenaga mo le mataupu, ia fa'avagavaga pea lou taimi e su'esu'e ai le tusi faitau ua tu'uina atu.

SINA MANATU MO LE MATAUPU:

I le Salamo e 133, e i ai le manatu o se Salamo na tusia e Tavita ina ua omai fa'atasi ituaiga uma e sefulu ma le lua o Isaraelu e opogi Tavita e fai ma tupu. E fa'apea le tala e fitu ma le afa tausaga o avea Tavita ma tupu o Iuta,

ona fa'atoa a omai fa'atasi ai lea o ituaiga uma e 12 i lalo o lana pule'aga sei'a o'o lava ina maliu Tavita. E le o fa'amamafa e Tavita i le Salamo lona avea ma tupu. O lo'o fa'amamafa le taua o le nonofo fa'atasi ma le nonofo fealofani, e fa'afoe ai se fa'amoemoe e pei o le fauina o se malo, le fauina o se nu'u, le fauina o se aiga, po'o le fauina foi o se Ekalesia.

Mataulia foi, e le faigofie ona aumai fa'atasi ituaiga uma e sefululua i le vaitau o le filifiliga o tupu mo le malo aufa'atasi o Isaraelu. O ituaiga o Isaraelu e le ni ituaiga na tutupu mai i se fa'avae se tasi. E ui o i latou uma o le fanau e to'a sefulu ma le lua a Iakopo, lea na toe fa'aigoaina e le Atua i le igoa Isaraelu, ae fa usuga a Iakopo na tutupu mai ai le fanau tama lea na avea ma ituaiga o Isaraelu. Leitia a naunau Tavita e tusi le Salamo lea, ona o le lelei ma matagofie o mea e mafai ona tutupu pe a ola fealofani ma ola fetausia'i tagata uma.

O lo'o fa'atusa e Tavita le matagofie o le nofo lelei ma le nofo fealofani o tagata i le u'u manogi. O le u'u o lo'o ta'ua i le Salamo, o le u'u lea na fa'atonu e le Atua Mose e fausia mai mea manogi tau tele e fa ina ia fa'au'uina ai mea paia ma le atolaau, ma fa'au'u ai ma Arona ma ositaulaga. O le u'u la lea ma lona sasala pe a fa'au'uina ai ositaulaga, fai mai Tavita, e fa'apena le sasala o le manogi o le nofo lelei ma le nofo fealofani, aua o le sasala ua fausia mai mea manogi eseese.

Ona toe fa'atusa foi lea e Tavita i le sau mai Heremoni. O le sau, o le susu o le vaveao e fa'asusu ai lau o laau ma aumai ai fa'amanuiaga i auvae mauga. Fai mai Tavita, e fa'apena fa'amanuiaga ma foliga o le fa'aolataga e maua pe a ola fealofani ma ola fetausia'i tagata. E fa'apea fa'amatalaga o le vaitau o le nofoaigatupu a Tavita, ina ua tu'ufa'atasi ituaiga e 12, o le vaitau e le gata o le malosi ma le mamalu o Isaraelu, ae o le vaitau foi o le ola fa'atuatua o le nuu o le Atua. E leai se malo na mafai ona fa'asagatau atu ia Isaraelu i le vaitau o le aufa'atasi o ituaiga uma e fausia le malo o Isaraelu.

Tamaiti, e le se mea faigofie le ola fealofani ma le ola fetausia'i o mea nei o uso, ma aiga, o nu'u, e o'o lava i totonu o Ekalesia. A o'o ina ta'a le fili ma lamatia le loto lelei, osofa'ia le agalelei ma le fealolofaa'i o tagata, ona tutupu loa lea o maseiga, alia'e foi taua ma fevaevaea'iga, ma le alofia ai le toto ma sa'a i totonu o mafutaga.

Atonu o le mea foi lea na a'oa'o ai Iesu i ona so'o. "Ia outou fealofani. E iloa o o'u so'o outou pe a outou fealofani." O le ola fetausia'i ma le ola fealofani, e le se mea fa'aletagata. E le o se atamai foi o le tagata e tupu ai le alofa atu ma le agalelei atu i le isi tagata. Ae peita'i, o le feso'ota'iga o le tagata i le tagata e afua mai le alofa ma le agalelei fa'ale-Atua na te fa'ama'ite i o tatou loto ma agaga.

GALUEGA FA'ATINO: Tusiga solo

1. Tu'u le avanoa i le vasega e tusi mai ai latou Solo (poem), o le ulutala "**O le Loto**" O le faitalia lava o le tamaititi, e fua i ai le tele o lana solo e tusi ai.
2. A uma, ona fa'asolo lea i luga e faitau a latou solo, ma ia togi lelei e faiaoga, ae manaia foi ae saunia i nai fa'ailoga mo le vasega.

A'OA'OGA:

1. E fiafia le Atua pe a lotogatasi ma galulue fa'atasi.

2. ‘Aua ne’i pulea e le ita o tatou loto, na o le vevesi e maua mai ai.
3. O le lotogatasi, e malosi ma maopoopo ai so’o se mafutaga.
4. Na o le Atua na te silafia o tatou loto, ma mea uma tatou te faia.

PESE: Se mea ina lelei, o uso e fealofani
 Se mea ina lelei, o uso e fealofani
 Fetalai Iesu, ia outou fealofani.

Ia saunia e le faiaoga le tatalo e fa’auma ai le vasega, ma ia toe fa’amanatu i le vasega le suega mo le Aso Sa o lumana’i.

IA SAUNIA TATOU MO TAPUAIGA O LENEI ASO SA!!

★★☞☞☞☞☞☞☞★★★☆☆☆☆☆☆☆☆☆☆☆☆☆☆☆☆☆☆☞☞☞☞☞☞★★

ASO SA FEPUARI 22, 2026

MATAUPU: “SUEGA FA’AMANATU”

TUSI FAITAU: Isaia 43:1-7, Ruta 1:1-18, Salamo 133

SINI: Ia su’esu’eina atili ai mafaufau o le fanau, ina ia manatua pea mataupu o le Tusi Paia o lo’o a’oa’oina ai pea i latou.

FA’ASOA MA FAIAOGA:

Ua tatou o’o mai i le Aso Sa mulimuli o lenei Masina, fa’amalo lava le galulue fa’afetai foi le onosa’i. Viia le Atua ona o lana tausiga le mavae i lo outou soifua ma lo tatou ola, manatu ai o lo’o tumua’i tutusa ai tatou uma i lona alofa. Ae mo le tatou suega fa’amanatu, e taoto atu lava le fa’atinoina i faiaoga. Ua saunia lava a tatou fesili, ae le vaoia ai la outou fa’atofala’iga i nisi auala mo le lelei e sili atu ae a tatou fanau.

FA’ATINOGA O LE SUEGA: Fesili ma Tali

1. O le a le igoa na valaauina ai le nu’u o le Atua i le amataga?

Tali: O Israelu

2. O ai na osi feagaiga ma Israelu?

Tali: O le Atua

3. O le a la le feau a le perofeta o Isaia mo le nu’u o le Atua?

Tali: Ia latou manatua le na valaauina i latou i lona lava igoa, o le Atua lea.

4. I se isi va’aiga i le tusi lenei o Isaia pe a faitauina, o le a le vaega lea e i ai le mataupu e 43?

Tali: O le vaega lona lua

5. O le a le finagalo o le Atua mo lona nu’u filifilia?

Tali: O le finagalo o le Atua, ia aua ne’i fano ona tagata a ‘ia fa’aolaina ma lavea’ina.

6. O le a le ta’utinoga a Ruta na fai ia Naomi le Tina o lona to’alua?

Tali: O le mea e te alu i ai, ou te alu atu ai foi, o le mea e te nofo ai, ou te nofo ai foi, e fai lou nu’u mo’u nu’u, e fai foi lou Atua mo’u Atua, o le mea e te oti ai, ou te oti ai foi.

7. O ai le igoa o le to’alua o Naomi?

Tali: O Elimeleka

8. A o ai igoa o fafine Moapi lea na nonofo ai le fanau tama a Naomi?

Tali: O Orepa ma Ruta

9. O ai igoa o le fanau tama a Elimeleka ma Naomi?

Tali: O Ma'alona ma Kilion

10. O le a se a'oa'oga sa e maua mai i le ta'utinoga fa'amaoni a Ruta?

Tali: E fa'amaoni le alofa o le Atua mo i tatou uma o lana fanau.

11. O le a se tala a le fai-Salamo e tusa ma le mataupu, 'Lotogatasi'?

Tali: O se mea e matua matagofie, a e omai fa'atasi ma mafuta fa'atasi o fanau a le Atua.

12. O le a se ata o lo'o fa'atusa i ai e le fai-Salamo, le lotogatasi?

Tali: O le ata o le Atua e mafuta ma auai mai i lana fanau i taimi uma.

Fa'afetai mo le galuega o lenei aso, ia agalelei le Atua ma fa'amanuia atu. Ia saili ane se pese, ma fa'ai'u le vasega i le tatalo. Ia Ta'u le tusi faitau o le mataupu o le Aso Sa o lumana'i, o le galuega e fai i le fale.

IA MANUIA TELE LE ASO SA!

ASO SA MATI 01, 2026

MATAUPU: "O LE MANA O LE TALA LELEI" (The power of the Gospel)

TUSI FAITAU: Roma 1:1-17

SINI: Ia mae'a le mataupu, ua malamalama le fanau i le malosi o le mana o le Tala Lelei.

FA'AMANATU MO FAIAOGA:

O le mana o le tala lelei, e mafai foi ona una'ia ma fa'alatele e le tatou galuega fa'afaiaoga Aso Sa. O le uiga o le manatu, ia fa'atino lava la tatou galuega i le mea e gata ai lo tatou mafai, ae fa'alagolago mea uma i le agaga o le Atua e fesoasoani mai. Fa'afetai tele le fa'amalolosi i lo outou valaauina, o le tauologologo lava ina ia tautuana lau tapenaga mo le mataupu, ia lava le taimi e mafuta ai ma le tusi faitau. Ia manuia le tapenaga.

FESOASOANI MO LE MATAUPU:

Mo Paulo lava ia, o Iesu Keriso o le Talalelei na mua'i folafola e le Atua ia Aperaa, a o le'i tu'uina mai e le Atua le tulafono. Ma o lo'o molimau foi i ai le tulafono ma le au perofeta i lea folafolaga fa'a-feagaiga a le Atua, ua fa'aalia ai lana amiotonu ma lona fa'amaoni i ana folafolaga. O le amiotonu a le Atua, o le tasi lea suafa e fa'asino ia Iesu Keriso. O le fa'amoemoe fa'aola o le Atua e mana'omia ai se Isaraelu faamaoni na te faataunuuna. Ma ua aumai ai e le Atua lona Alo, ma ia ofoina atu i le Atua le faamaoni ma le fa'atuatua na le olaina e Isaraelu. O le fa'atuatua la ia Iesu, o le maua lava lea o le amiotonu a le Atua.

O le tatou mataupu, O le mana o le Talalelei' o le mana ma le malosi lea na liliuina atoa le olaga o Paulo ma avea ai ma aposetolo e talai le talalelei ia Iesu Keriso. O le afuaga foi lea o lana tusi i le Ekalesia i Roma, ina ia malamalama ma manino tagata i le uiga moni o le talalelei ma le malosi o le mana o le talalelei. O le talalelei, o tala o le Keriso toetu po'o le Keriso manumalo. O Paulo, o le auauna a Iesu Keriso, na valaauina e fai ma aposetolo, ua ia te ia foi le mana e fai ai lana galuega talai. E talitonu Paulo, o le toetu mai o Iesu nai e ua oti, ua

O le tusi a le aposetolo, ona o lona naunau e fia feiloa'i atu ma avatu se meaalofo o le agaga, ina ia fa'atumauiina ai le fa'atuatua o tagata, e ui ina naunau le loto e fia feiloa'i, ae o lo'o i ai mea o lo'o taofia ai. O lona uiga, i le manatu o le aposetolo, po'o a lava mea o lo'o tutupu i ia ona po, ae fai mai a ia, 'ou te le ma i le tala lelei ia Keriso; aua o le mana lava lea o le Atua e ola ai i latou uma o e fa'atuatua, e muamua le Iutaia, atoa ma le Eleni. Aua ua fa'aalia mai ai le amiotonu a le Atua i le fa'atuatua, ina ia fa'atuatua ai, pei ona tusia, E ola le tagata amiotonu i le fa'atuatua.'

Ioē, o le mana o le tala lelei lea ua faa-talaleleiina ai tatou uma o e ua fa’atuatua ma talitonu i le Keriso toetu. O le fesili, o ai e fa’aauauina ma fa’alautele le tala lelei, o le tali o tatou, ia tatou fiafia e tala’i atu le tala lelei mo e o lo’o pogisa pea i faiga a le fili ma ana ‘au. O le tatou fa’atuatua i le mana o le tala lelei po’o le Keriso manumalo, lea ua fa’asa’oloto mai ai tatou mai le pologa o le agasala.

1. Ia fetufaa'i ma le vasega i nisi uiga o le mataupu sa fa'amatalaina, ia fa'asoa mai foi o latou manatu e tatala atili ai o latou mafau, ma fa'alautele ai pea le a'ano moni o le tala mai le Tusi Paia.
2. Ae le tuua ai lava le fai o ni fesili e fa'aosofia ai o latou manatu, ma 'ia aua ai ne'i taofiofia o latou lagona e fa'asoa fa'atasi ai ma faiaoga.

TATALO: Fa’afetai tele le Atua i lau talalelei ua fa’atalalelei ai i matou, ia a’oa’o mai pea ia matou loto tetele e fa’aauauina pea, ma ia viia ai pea lau afio e fa’avavau. Fa’amagalo i matou le fanau agasala. Ona o Iesu la matou uo sili. Amene.

E fa'atalofa ma fa'afeiloa'i atu foi i lo outou mamalu. E ao pea ona tatou fa'afetaia le agalelei silisili ese o le Atua, ua aumai ai lo outou soifua ma lo tatou ola i lenei aso ua tatou aulia ma le manuia. Malo lava le fa'amalolosi

i o outou tiute ma faiva masani, manatu foi o lo’o manuia mea uma, aemaise o lo outou soifua tulu’i mai le Atua. Ae o le tu’utu’u laau fa’amanuiti atu lava, ina ia tautuana lau tapenaga mo le mataupu, ia lava lou taimi ma le tusi faitau e su’esu’e ai. Ia agalelei le Atua i lau tapenaga.

SINA FA’ASOA MO LE MATAUPU

O le tatou mataupu o lenei aso e tusa ai ma le tusi faitau, o le tala i le foafoaina o le lalolagi, o le tala i le fausiaina e le Atua o feso’ota’iga; o tala o le fausia e le Atua o mafutaga ma faia e nonofo lelei ai mea uma; o tala i le fausiaina e le Atua o vafeagai. O tala o le foafoaga, o tala i le va feagai o le Atua ma le tagata na ia faia; o tala o le va feagai o le tane ma le ava; o le va o le tagata ma isi mea o le foafoaga. O le manatu aoao tetele lea o tala o le foafoaga. O le vaega la lea sa tatou faitauina, o le tala o le oia o le va feagai; o le tala o mafutaga ua masofasofa ma afaina ai le va feagai.

O le uiga la lea o le tala. O le tala e fa’amatala mai ai ia i tatou, a oia le va feagai, ma motusia mafutaga mafana, ona faoa lea o fa’amanuiaga e tatau ona maua. A masofasofa feso’ota’iga lelei, ona aveesea lea o meaalofoa mai le lelei o le Atua e tatau ona maua e lana foafoaga na fai. Manatua foi, o tala o le foafoaga, o tala o le lelei ma le matagofie o le Atua na ia faia ai mea uma e o’o lava i le tagata. Sa gaoioi le Agaga o le Atua e fai mea uma e tusa ma lona finagalo. A mafuta fa’atasi le Atua ma le tagata, ma mea uma na ia faia, ona tumau lea o manuia ma le lelei o le Atua. Ae a fete’ena’i, ma fefulituaa’i, ma le feso’ota’i lelei mea na faia e le Atua, ma le usiusita’i mea na faia i le finagalo o le Atua, ona faoa lea o fa’amanuiaga ma mea lelei na foa’i mai e le Atua.

O le ulua’i tala lea o mafutaga oia, o le ulua’i tala o feso’ota’iga motusia, ma so’otaga ua fefulituaa’i ma ua lu’itauina ai le lelei o le Atua. O le tatou mataupu la o lenei aso, se’i o tatou va’ava’ai i vaivaiga e alia’e mai i totonu o mafutaga ma oia ai le va feagai. O lo’o ta’ua i le tala le i ai o fa’aosoosoga, ma le i ai o le fa’aosoosoina e lu’itauina ai olaga o tagata.

O fa’aosoosoga, o lu’itau ia mai fafo atu o le tagata, e pei o fa’aosoosoga a le gata i le fafine. A faitau lelei i le tala lenei, o lo’o atagia ai fa’aosoosoga eseese o lo’o taufaaoso ai e le gata le fafine. Fa’aosoosoga o le ese o le iloa o le Atua mai le iloa o le tagata, fa’aosoosoga o le ese o le atamai o le Atua mai le atamai o le tagata, fa’aosoosoga o le ese o le malosi o le Atua ma le malosi o le tagata. O fa’aosoosoga uma nei ua la’u e le gata i le fafine e fai ma fa’aosoosoga ia te ia, e foliga mai ai ua le amanaia e le Atua le tagata.

GALUEGA FA’ATINO: Ia vaelua le vasega, ona fa’asoa lea i fesili nei.

Vaega 1: Kenese 3:8-13

1. O ai le fa’amasino i le Tala?
2. O a moliaga i le fa’amasinoga, ma o ai na molimau ai?
3. O le a le mea ua tupu i le ulua’i tagata ua mafua ai ona fa’amasinoina?
4. O a nisi uiga leaga o le ulua’i tagata e ‘ese mai le le usita’i?

Vaega 11: Kenese 3:14-24

1. O ai na muamua fa'asala, ma o le a lona fa'asalaga?
2. O a fa'asalaga o le ulua'i tagata?
3. O ai o lo'o fa'asino i ai na te tu'imomomo le ulu o le gata?
4. O a a'afiaga o le fa'asalaga o le agasala a le ulua'i tagata ma le foafoaga?

A'OA'OGA:

1. O le le fa'alogo ma usita'i i le Atua e malaia ai le ola.
2. E le mafai ona lafi se tasi i luma o le Atua.
3. O le agasala a le ulua'i tagata na o'o mai ai le oti ma mea leaga uma.
4. Ia fa'aoga sa'o le sa'olotoga ua aumai e le Atua.

PESE: Tulei 'ese, tulei 'ese, tuele 'ese

Avega mamafa uma o lou agaga.

O agasala uma lava, e goto ifo i le palapala.

Tulei 'ese, tulei 'ese, tulei 'ese, avega mamafa uma o lou agaga.

MANUIA TAPUA'IGA O LE ASO SA!!

ASO SA MATI 15, 2026

MATAUPU: "O FEA LOU FA'ASINOMAGA" (Home is where the heart is)

TUSI FAITAU: Teuteronome 6: 1-12

SINI: Ia uma ane le mataupu, ua iloa e le vasega le uiga tonu o le tala, ma ia malamalama i ai.

FA'AMANATU MO FAIAOGA:

I le suafa manumalo o lo tatou Alii o le Iesu Keriso le faiaoga sili, e fa'atalofa atu ai i lo outou mamalu. Talosia i le alofa tausii mai o le Atua, ua tatou aulia ma le manuia leni taeao fou. Fa'afetai foi le onosa'i i le fa'atinoina o tiute ma faiva o lo'o feagai pea ma outou. Ae o le taugologolo atu lava ina ia lava saunia pea le faiaoga, e ala i le su'esu'e ma faitau le tusi faitau mo le mataupu. Ia manuia le tapenaga.

FESOASOANI MO FAIAOGA:

O le malaga a tagata Isaraelu lea e ta'ua o le Esoto, o le malaga sa fa'amaite ma amata mea ai le Atua. E lua mafuaaga tetele na ala ai ona fa'amaite le Atua i le o ese mai o tagata Isaraelu mai Aikupito. Muamua, ina sei fa'ataunuu le tautoga a le Atua na fai i augatama o Isaraelu, o Aperamo, Isaako ma Iakopo. O le tautoga a le Atua na ia folafola ai le nuu o Kanana e fai ma nofoaga o le fanauga a Aperamo. Sa toe tauto ai foi le Atua ia Isaako ma Iakopo i le nofoaga lava lea e fai ma nofoaga o tagata e tutupu mai ia i laua. O le mea lea na ta'ua ai Aperamo, Isaako ma Iakopo o le augatama o Isaraelu, aua o le gafa lea na tutupu mai ai le fanauga a Isaraelu lea na ta'ua o le nuu o le Atua. E le gata la o le tautoga a le Atua e fa'ataui i fanua ma laueleele o Kanana, ae o le tautoga foi a le Atua e uiga i se nuu tele e tupu mai i sulii o Aperamo, Isaako ma Iakopo.

O le mafuaaga lona lua o le Esoto, on aua fa'afofoga le Atua i le oi ma le tagi o tagata Isaraelu ona o le pologa i lalo o pulega sau a Aikupito. Lea na ala ai ona valauina e le Atua Mose e alu i Aikupito e aumai lona nuu mai le nofo pologa. O le uiga lea o le fetalaiga a le Atua o lo'o i le fuaiupu e 10. "A fa'ao'oina oe e le Alii lou Atua i le nuu na ia tauto ai." O le fa'aupuga e toe fa'amanatu ai i tagata Isaraelu, e le ona o so latou malosii, po'o so latou poto ua mafua ai ona taunuu le malaga. E leai. Ae ona ua fa'aoo i latou e le Atua e fa'ataunuu ana folafolaga.

I nei tausaga e 40 sa sau ai le faigamalaga o le Esoto, o le Atua lava sa ia mua'au ma muli'au e ta'ita'i mai le faigamalaga. O ia sa fafaga ma fa'ainu. O ia sa malutia ma fa'asaoina le nuu i faigata o le ala, o fili foi ma taua sa latou feagai i le ala, o le Atua lava sa tu manumalo ai Isaraelu. O lea la ua toe o se aga ona fa'ataunuu lea o i

FESOASOANI MO FAIAOGA:

Malo afua ailao ua maua i le alofa ma le agalelei o le Atua, manatu lava o lo’o tatou maua fa’atasi lenei aso fou i le manuia mai ia te Ia. Fa’amalo foi le pale i faiva ese’ese ua valaauina i ai lo outou soifua ma lo tatou ola. O le tatou fa’amanatu masani lava, ua ia te outou lava le silafia o le tatou galuega, ae o le atoaga lava o lau tapenaga, ia lava le lua mafutaga ma le tusi faitau o le mataupu. Ia manuia tele le tapenaga.

SINA FA’ASOA MO LE MATAUPU:

O le tatou mataupu i lenei taeao “Aga’i i le pogisa” o le vaega o le tala sa tatou faitauina, o lea ua fa’ailoa e Iesu i ona soo, e tatau ona ia alu i Ierusalem. O le finagalo o le Alii, e ao lava ona nofo malamalama ma iloa e lona ‘au soo mea uma e tutupu ao le’i tu’ua e Ia i latou. O lona uiga, e ao lava ona saunia lona ‘au soo i taimi uma. O le valoaga a Iesu ua ia faailoa i ona soo le mea e taunuu i ai lana galuega. O lana galuega e aga’i i le pogisa, a’o tua atu o lo’o i ai le faamoemoe fou mo le galuega fa’aauau a lona ‘au soo. Ua o’o i le taimi e tatau ai ona fa’ailoa i soo o Iesu, ma silafia foi e Iesu le so’o ua tapena mo lona valaauina.

Ta’ua e Mataio, o le taimi lava na fa’ailoa atu ai e Iesu i ona soo, e tatau ona ia alu i Ierusalem, e fa’atigaina foi i mea e tele e toaina ma le au ositaulaga sili, ma le au tusiupu, e fasiotia foi o ia, e fa’atuina foi o ia i le aso tolu. Na tali ane Peteru ma ia fa’apea, “Le Alii e, ia mamao ia te oe lea mea, e le o’o lena mea ia te oe.” Ona faliu lea o Iesu ma fa’apea atu ia Peteru, “Satani e, ina alu ia oe i o’u tua, ua fai oe ma mea ou te tausuai ai; aua e le o mea a le Atua ua e loto i ai, a o mea a tagata.”

Silafia lelei e Iesu le mea o lo’o i le loto o Peteru, e na ona tautala i upu fa’afoliga, ae le o i ai lona loto. Ae o le pogisa lava lea e tasi o lo’o fa’ama’i pipisi i le au so’o o le Alii, e tiga lava ona mafuta ma va’ava’ai i vavega ma fa’alogo i a’oa’oga a Iesu, ae ola masalosalo lava. O uiga ia o lo’o taumafai Iesu ia fa’afitia e ona soo, ona mafai lea ona ta’ua ma soo moni e mulimuli ia te Ia. O le avea o le tagata ma soo o Iesu, e tatau ona ofo atoa le ola, o lona uiga, ia tuua e ia mea uma e pei ona masani ai, ona mafai lea ona amo le satauro o Keriso. O le aga’i i le pogisa e pei ona aumai i le tala, o le aga’i o le Alii i ona puapuaga se’ia o’o lava ina maliu. E pei lava ona ia fa’ailoa i ona so’o, aua e tatau ona latou iloa ma malamalama i ai.

O le fa’ailoa a Iesu i ona soo, ia fai i ai le filifiliga a le soo pe fia mulimuli pe leai. O le avea ma soo mulimuli, e ofo le ola, o lona uiga e tatau ona tigaina, e le o se mea faigofie. O le soifua ofoina o Iesu, sa fai ma fa’aolataga mo le lalolagi agasala. Na puapuagatia ma fa’atigaina, na o’o i le satauro, na maliu ma tanumia i le tuugamau, ae na toetu manumalo, ua tatou manumalo fa’atasi ai ma Ia e fa’avavau.

GALUEGA FA’ATINO: Fetufaa’iga

1. Ia fetufaa’i ma le vasega, ia tatala mai foi o latou mafaufau e fesili ma fa’amatala mai ni o latou foi lagona e tusa o le tala.
2. Ia fai foi e le faiaoga ni fesili fa’atupu manatu mo le vasega, e tatala atili ai ma fa’alatele le mataupu.

A’OA’OGA:

1. E silafia e Iesu mea uma o lo’o i tatou loto.
2. O le avea ma so’o moni e mulimuli ia Iesu, o le ola ua ofo atoa mo le galuega.
3. Ia ola tapena ma sauni i so’o se taimi o le savaliga.

PESE: Ua ou filifili, e mulimuli ia Iesu x2

Ou te le toe foi, ou te le toe foi.

Ia tofi ane se tama’ita’i e fa’ai’u le vasega i se tatalo.

IA MANUIA LE ASO SA!!



ASO SA MATI 29, 2026 (Aso Sa Laupama)

MATAUPU: “MALOSI MA LE AUAI” (Force and presence)

TUSI FAITAU: Mataio 26: 36-56

SINI: Ia mae’a le mataupu ua malamalama le vasega, o le malosi sa ia Iesu, ona sa auai ia te Ia le Agaga o le Atua.

FESOASOANI MO FAIAOGA:

Ua tatou o’o mai i le Aso Sa mulimuli o lenei foi Masina, malo lava le tauata’i fa’afetai fai o le faiva. Tatou fa’afetai a’e i le Atua e ou le malosi ma le pule uma lava, ua mafua ai ona tatou maua le ola i lea aso ma lea aso. Ua tatou i ai foi i lenei vaitau, tatou te mafaufau loloto ai i puapuaga sa feagai ma lo tatou Alii o Iesu Keriso sei’a o’o atu i lona maliu. E ao ai lava foi ona tatou toe mafaufau i lo tatou ola valaauina po’o fa’apefea mai. O le mea lea, ia lava lou taimi e faitau ai ma su’esu’e le tatou tusi faitau ua tu’uina atu mo le mataupu.

NAI MANATU MO LE MATAUPU:

O le tatou tusi faitau o lo’o aumai ai le tatou mataupu o lenei taeao, e tolu vaega o tagata o lo’o manino mai le tala. E tolu lava le vaega ia ma le latou fa’atinoga e tusa ma a latou lava filifiliga sa’oloto; ae o lo’o fai uma i le nofoaga e ta’ua o Ketesemane, le nofoaga e tu’u eseese ai le otaota o le olive ma le suauu mai le olive.

Muamua, o Iesu ma lana tauiviga e tusa o lona valaauina e lona Tama e fai ma fa’aola o le lalolagi. Le tauiviga na atutolu ai le tatalo a Iesu i lona Tama “Lo’u Tama e, afai e mafai, ia e aveese lenei ipu ia te a’u; ae aua le faia lo’u loto a o lou finagalo.” O lea ua amata le fa’auuina o le tupu o le malo o le Atua, o le Mesia na valo’ia.

Lua, o le ausoo lea na fetalai i ai Iesu ina ia “tatou mataala fa’atasi ma a’u.” E fa’atolu lava ona foi ane Iesu mai ana tatalo i lona Tama, ae o lo’o momoe lava ona soo. Ina ua pu’eina Iesu, ona fai mai lea o le molimau a Mataio. “Ona tuua ai lea o ia e le ausoo uma, ae sosola i latou (f.56). Mai le tele o a’oa’oga a Iesu i ona soo a o latou mafuta, ae o lea ua pu’eina Iesu, ae sosola ese ona soo.

Tolu, o e na fa’alataina ma pu’eina Iesu. O lo’o ta’ita’i mai e Iuta le Sekara le vaega lea. Ua fa’alataina e Iuta Iesu, ma ua latou pu’e ia te Ia. O i latou ia na fetalai i ai Iesu. “Ua outou omai ea ma pelu ma uatogi e pu’e mai ia te a’u, peiseai o se faomea?” O i latou ia o lo’o fai ma ave feau a le au ositaulaga ma le au tusiupu. O lea ua latou fa’atinoina le taupulepulega leaga na fai i le fale o Kaiafa le osi taulaga sili.

O mea uma nei o lo’o tutupu i le nofoaga lea e ta’ua o Ketesemane. E foliga mai ua tu’ulafoaiina Iesu e lona Tama. Ua tu’ulafoa’i foi e ona soo. Ma ua pu’e ma saisai e tagata na latou taupulepuleina lona oti. E le o ia i tatou se malosi ma se gafatia tatou te mataala ai na o i tatou i taimi o puapuaga ma faigata. Se’i vagana ua tatou au fa’atasi ma Iesu ona fa’atoa tatou manumalo lea i fili ma faigata o le olaga nei.

A o’o ina mamao i tatou ma lagona o’otia o Iesu ma lona alofa tunoa ua ofoina mai, e mafai lava ona tatou fa’alataina pea, ma pu’e pea Iesu e pei o se fao mea. O o tatou uiga fa’afiaamionu, ma o tatou talitonuga fia mama i luma o le Atua, o lo’o i ai le malosi tatou te fa’atigaina ma fa’apagotaina ai pea Iesu. Po’o le a lava lo tatou latalata ma lo tatou feasogi pea ma Iesu i aso uma, ae peita’i, a le suia lava o tatou loto ma o tatou agaga tatou te talia ai lana fa’aolataga, e avea pea i tatou ma auauna a le tiapolo e fa’ataunuu ana fuafuaga leaga. O tagata ia na o ane e fa’alata ma pu’e Iesu, o auauna ma tagata o lo’o galulue i lalo o taupulepulega leaga a ta’ita’i o le lotu Iutaia, le au osi taulaga ma le au tusiupu.

O tagata o lo’o ola i le olaga fa’apologaina, aua o lo’o fa’atonutonuina a latou fa’atinoga e pulega leaga. E leai lava so latou sa’olotoga e fai ai le mea o lo’o i o latou loto ma agaga. O le vaivaiga foi lea na o’o i ai Iuta, aua ua ia ofoina atu lona ola i taupulepulega leaga a le tiapolo ma ua avea ma ala ua matua tau mamao ai lava Iuta mai le fa’aolataga.

GALUEGA FA’ATINO: Fa’atino le tala

1. Ua tatou masani i le Aso Sa lenei, e fa’atino ai le malaga fa’a-tupu a Iesu i Ierusalem. Ae manaia foi ae sui i se isi vaaiga, o le uiga o le manatu. O se vaaiga fa’aonapo nei, e pei o le fa’ataliga o se tupu mai se isi malo pei o Peretania, Amerika ma isi. Ae auga uma lava i le malaga fa’atupu a Iesu.

Fa’afetai mo le galuega sa feagai ai o lenei Aso Sa, ia saili ane se pese ma fa’ai’u le vasega i le tatalo e saunia e se tama’ita’i.



ASO SA APERILA 05, 2026 (ASO SA O LE ESETA)

MATAUPU: “E MONI LE TOETU” (Risen indeed)

TUSI FAITAU: Mataio 28: 1-20

SINI: Ia iloa e tamaiti, le molimau a le tusi o Mataio i le toetu o Iesu, ma e le fesiligia le moni o le toetu.

FA’AMALOSI MO FAIAOGA:

E fa’atalofa atu foi i lenei taeao fou, taeao o lo’o tatou fa’amanatu ai le toetu manumalo o lo tatou Alii o Iesu Keriso. Malo le soifua manuia, fa’afetai i le Atua i lana puipuiga malu i lo outou soifua ma lo tatou ola. Talitonu lava o lo’o tatou maua fa’atasi lenei aso fou i lona alofa tausī mai. Ae le tuua ai lava le fa’amanatu atu pea, ina ia tautuana lau tapenaga mo a tatou mataupu, o le tusi faitau lava e nanea ai lau fa’asoa, ia lava pea lou taimi e faitau ai. Ia manuia tele le tapenaga.

FESOASOANI MO LE MATAUPU:

O le tatou faitauga o lenei Aso Sa, o le molimau a Mataio i le mea na tupu i le aso tolu talu na maliu Iesu, le aso na toetu mai ai Iesu mai le oti ma le tuugamau. Ma o le Aso Sa la lenei, o lo’o fa’amanatuina ai e Ekalesia Kerisiano uma i le lalolagi atoa le toetu o Iesu. E leai lava se Ekalesia Kerisiano na te fesiligia le moni o le toetu mai o Iesu Keriso. O le ogatotonugalemu lea o le fa’atuatuaga Kerisiano. O le maliu ma le toetu manumalo mai o Iesu Keriso mai le oti ma le tuugamau.

MANATU MO FAIAOGA:

O lo’o tatou i ai pea i le vaitau o le toetu o lo tatou Alii o Iesu Keriso. Ae manatu foi o lo’o tatou maua fa’atasi lenei taeao fou i le agalelei mai o Iesu toetu. Malo le folau manuia, fa’afetai foi le fa’amalolosi i tiute ma faiva o lo’o feagai pea ma outou. Talitonu foi o lo’o sologa lelei le fa’atinoina o la tatou galuega, malo lava le onosa’i. O le tu’umumusu lava a le Ofisa mo le manuia o la tatou galuega. O le tusi faitau lava, ia fa’avagavaga pea lou taimi e su’esu’e ai. Ia manuia le tapenaga.

FA’ASOA MO LE MATAUPU:

O le Salamo sa faitauina, o lo’o aumai ai le laulaufaiva e tautala i mea fa’asausili. O le tatalo a Tavita i e o lo’o agatele mai. Fai mai a ia, ‘Le Alii e, ia e fa’aola mai; aua ua uma tagata amio Atua; aua ua mavae e ua fa’amaoni nai le fanau a tagata.’ Ua tautala le fai-Salamo i uiga o tagata na feagai ma ia i lana savaliga i ona foi taimi. Na feagai ma tagata leaga, tagata e tautalatala i laugutu molemole ma le fa’alotolotolua. O fa’afitauli ia ma faigata na fesaga’i ma le fai-Salamo, na afua matagi ai lana tatalo atu i le Atua ina ia fa’aola mai ia te ia. E le faigofie le savaliga na feagai ma Tavita i le fa’atinoina o ona faiva fa’ata’ita’i, aemaise lava i uiga ma amioga a tagata.

Fai mai a ia, ua mavae atu tagata amio Atua, o lona uiga o taimi o le tupulaga fou, o tagata latou te le’i lagonaina le faigata na tauasa mai i le amataga, e le’i tofo i faafitauli na savalia mai e o latou tua’a ua mavae. O i latou nei ua ola ane ma fai mai o lo latou malosi lava na maua ai manuia, ua latou tautala faasausili, ma ua latou manatu o latou laulaufaiva latou te manumalo ai ma faapea ifo, o ai ea so tatou alii?

Ua manatu le fai-Salamo, na o le Atua lava na te maua ai le fesoasoani, o ia foi na te ave’ese uiga fa’amauualuluga o tagata. A o uiga foi ia ma amioaga a le nuu o le Atua, ina ua seei i fa’amanuiaga e tele mai le Atua. Ua na ona taulagi o lo latou Atua, ae ua fai lava le mea e loto i ai le tagata ia. Ua pesia i uiga o malo tuaoi po’o nuu fa’apaupau, latou te leiloa le Atua, ma ola fa’afoliga.

O le laulaufaiva mimita, e fanau mai ai le fa’amauualuga, le fa’asausili ma le fa’alotolotolua, ma fa’atupu ai vevesi ma misa i le va o tagata. E mafai e le laulaufaiva mimita ona talepe ma fa’aleaga mafutaga ua maoopoopo ma mafanafana. O le malosi o le laulaufaiva, e mafai ona ola ai le tagata, e mafai foi ona oti ai le tagata. Ae fai mai le fai-Salamo, e vavae ese e le Alii o laugutu molemole uma lava, ma le laulaufaiva e tautala i mea fa’asausili. O lona uiga e le fīafia le Atua i le tagata e atagia ai uiga e pei ona ta’ua. O le feau foi lea mo tatou, ia tatou ‘aloalo ese ma uiga leaga e pei ona aumai e le fai-Salamo, a ‘ia amio lelei ma usita’i i le Atua ma matua, ona manuia lea o lou olaga i aso uma.

GALUEGA FA’ATINO: Fesili fa’atupu manatu

1. O se mea lelei le laulaufaiva mimita?

Tali: Leai

Molimau foi Ioane, o Iesu o Ia o le malamalama o le lalolagi. O le malamalama ua susulu mai i le pogisa ma manumalo ai i le pogisa. O le malamalama e maua ai le ola, e pei ona fetalai le Atua i le amataga, “Ia malamalama ona malamalama ai lea.” O le malamalama lava lea, o lo’o fa’asusulu atu e Iesu. Peita’i, o lo’o tumau pea le pogisa o le ‘au faresaio, ma ua ola ai pea i le pogisa. O lo’o taoama pea i le Tulafono, ae ua afio mai Iesu le Alo o le Atua, o Ia lava le atoaga o le Tulafono. O le ala foi lea o lo latou fesiligia o le tulaga Atua o Iesu, ona o latou manatu fa’a-Iutaia.

O le feau foi lea mo tatou, na afio mai Iesu i le lalolagi e aumai le fa’atuatua i le mea ua leai se fa’atuatua, e aumai le fa’amoemoe i le mea ua leai se fa’amoemoe, ma aumai le mautinoa i le mea o lo’o i ai le le mautonu ma le ola fa’amauualuga o le tagata. Fetalai Iesu, “O a’u nei le Ala, Upu moni ma le Ola, e le alu atu lava se tasi i le Tama, pe a le ui mai ia te A’u.”

1. Ia fetufaa'i ma le vasega i ni fesili e fa'atatau i le mataupu, ma ni manatu fa'aalia. Ia tuu sa'oloto pea le avanoa e fai ai ni faitioga po'o ni manatu e soalaupule ai le mataupu.

TATALO: la saunia e lau susuga i le Faiaoga se tatalo e faaiu ai le vasega..

SINI: Ia manatua ai pea e tamaiti tala mai le Tusi Paia sa a’oa’oina ai i lenei Masina e pei ona fa’amatalaina i mataupu ta’itasi.

Tali: O le Agelu a le Alii mai le lagi.

SINA FA'ASOA MO LE TALA:

O le tatou tusi faitau o lenei taeao, o lo’o aumai ai le valaaulia a Iesu i le vaega o le mataupu lea e 11. O tagata ia o lo’o momoli i ai le valaaulia a Iesu, o tagata o lo’o feagai ma mea mamafa o le olaga. O mamafa o le ola taotaomia ona o pulega a le malo Roma; o mamafa ma tiga o tulafono ma poloaiga fa’ale lotu Iutaia; o mamafa o le ola mativa ma le le tagolima; o mamafa ona o le ola agasala. O tagata o lo’o saisaitia i soo se faigata o le olaga, o tagata ia o lo’o valaaulia e Iesu, e omai ia te Ia. Se’i o tatou vailiili le fetalaiga a Iesu ina ia maua tonu lava le agaga o lo’o finagalo i ai lo tatou Alii mo tatou.

O le nanea o le valaaulia ua aumai e Iesu mo i tatou uma, ona o lea ua umia e Iesu le pule aoao o mea uma mai le Tama. O le pule ua to mai e le Tama i lona Atalii, o le pule foi lea ua mafai ai e Iesu ona fai le valaaulia lea, ‘Ia outou omai ia te a’u...Ia outou amoina la’u amo...O a’u foi e malolo ai outou.’ Ia outou omai ia te a’u. E le o le omai i se lotu, e le o le omai i se fa’atuatuaga, e le o le omai foi i se tapuaiga. E leai. O le omai ia Iesu. O le omai e mafuta ma le tagata, o Iesu Keriso, le Atalii o le Tama. O le to’atele o tagata a o i le lotu, latou te le’o o ia Iesu, ae o lo’o o e auai i le fa’apotopotoga. E le’o o e mafuta ma le Atua, ae o ona o le masaniga e auai i le lotu. Ae o le valaaulia a Iesu lea ua aumai. O lo’o fetalai Iesu i se fesoota’iga vavalalata o tatou o tagata Kerisiano ma Ia. O ai Ia? O Ia o le Atalii, o Ia foi o le ua umia le pule o mea uma.

“Outou uma o tigaina ma mafatia i avega.” E leai lava se isi o i tatou e leai se mea o tigaina ai, pe leai foi se mea mamafa i lona olaga. E tofu uma lava tatou ma vaivaiga, tofu foi le tagata ia ma ana avega o lo’o tauave. O tigaina o le tino, tigaina o le mafaufau, tigaina o le loto ma tigaina o le agaga. O lona uiga la, o i tatou uma lava ua i ai mafatiaga, o tatou na lea ua valaau mai i ai Iesu tatou te o atu ia te Ia. Silafia lelei e Iesu mea o lo’o mamafatu i o tatou olaga. Ma ia fa’apea mai ai, ‘O a’u e malolo ai outou.

E leai se isi o tatou e fia ave avega mamafa i le olaga atoa. Tatou te manaomia le mapusaga. Tatou te manaomia le malologa. Tatou te manaomia le saolotoga. E maua ia Iesu lo tatou malologa ma lo tatou saolotoga. A tatou faaa’oa’o ia Iesu, ma tatou mulimuli ia Iesu, ma avea i tatou ma soo moni o Iesu, ona tatou maua lea o le malologa o tatou agaga. O le upu moni, tatou te feagai pea ma faigata ma lu’itau o le olaga nei. Ae a tatou o ia Iesu, ma tatou amoina lana amo e amo gofie aua o lo’o tauamo fa’atasi ma Iesu.

GALUEGA FA’ATINO:

1. O ai tagata ia o lo’o momoli i ai le valaaulia a Iesu?

Tali: O tagata o lo’o taotaomia ma saisaitia ona o pulega a le malo Roma.

2. O le a le uiga o le fetalaiga a Iesu, ‘Ia outou omai ia te a’u’?

Tali: O le feso’ota’iga vavalalata a le tagata Kerisiano ma Iesu.

3. O a ni a’oa’oga taua ua mafai ona maua mai i le tala sa fa’amatalaina? (tali mai ai le vasega)

PESE: Le mafutaga fiafia, e le mafa’atuaia

Fa’alagolago i a’ao o Iesu

Le filemu, le manuia e maua uma ia te Ia.

Fa’alagolago i a’ao o Iesu.

Ia tofi e le faiaoga se tama e fa’ai’u le vasega i le tatalo.

Fai mai ua alu le malaga i Kanana i le mea e i ai Sekema i le aluna o More, ma avea ma ona nuu, toe malaga ma taunuu i Peteli ma aga atu i le itu i toga, ae o le taimi lea fai mai na oge ai lea nuu, o lea na toe o ifo ai loa i Aikupito i lona to’alua o Sarai e nonofo ai. O le tala malie, fai mai ua fai ane Aperamo i lona to’alua o Sarai, afai

e vaai ane tagata Aikupito ia te ia, ona fai ane lea o lana ava, ona latou fasioti lea ia te ia a e fa'aolaina ia. Ae fai atu i ai, o ia o lona tuafafine ina ia saogalemu ai o ia, e ola ai foi Aperamo. Ua agalelei Farao ma ona tagata ia Sarai ma o lea na foa'iina i ai o mamoe, o povi ma asini po'a e o'o lava i auauna asini fafine ma kamela. Peita'i ua fa'atigaina e le Atua o Farao ma lona aiga i mala tetele ona o Sarai le ava a Aperamo. Ua salamo Farao i le mea ua tupu na te le'i iloina. O lea na tuuina atu ai loa lea o Aperamo ma lana ava e o ma ave uma mea ua maua.

O le aotelega o le mataupu ma le tala pei ona tatou maua, o faiga ma fuafuaga loloto ma le mamao a le Atua mo Aperamo mai lona aiga ma lona nuu, o ata vaaia ia o le Atua e le o'o i ai se poto o le tagata. O le Atua alofa ma le Atua e fa'amaoni ana folafolaga mo lana auauna. Ua silafia ma ua filifilia ai e le Atua Aperamo ma ana auauna, e ala mai ai le manuia o aiga uma ma nuu uma o le lalolagi. O faiga ofoofogia a le Atua e tapena ai le tagata faatauvaa e malaga ai i le mea e leiloa, o se nofoaga e le'i vaaia muamua e Aperamo, o ni fa'amanuiaga e le'i manatu foi Aperamo na te mauaina. A o le tino mai o le faamoemoe o le Atua mo Aperamo ona o le fa'atuatua o ia i lona Atua na afua ai. O le faalogo ma le usita'i o Aperamo i lona Atua na tutupu ai vavega o fa'amanuiaga na tapena e le Atua, lea ua 'ae'ae ai Aperamo ma lona to'alua o Sarai e o'o lava i ona aiga ma ona tagata.

Le faamoemoe e le'i iloa e le tagata peita'i o lea ua manuia atu foi ma aiga uma o le lalolagi. O le tagata o lo'o malaga fa'atasi ma le Atua ma le fa'atuatua, e pule aoao le Atua i mea uma e oo lava i le tagata na faia e Ia, e ola ai i le lalolagi. O se feau taua lea mo i tatou i lenei Aso Sa le fanau, e faamanatu ma toe faatepa i ai lo tatou ola i aso uma. E i ai le taimi ma le aso e fetalai mai ai le Atua ia te i tatou ta'ito'atasi, i le mea ua finagalo i ai le Atua. Afai o mea e le o'o i ai so tatou malamalama ma se iloa, ia manatua, ia tatou fa'alogi lava ma le usita'i, e faia e le Atua mea sili ma aumai ana fa'amanuiaga mo oe ma a'u pe afai tatou te malaga ma faatino lona finagalo i le malosi o lo ta faatuatua ia te ia.

GALUEGA FA'ATINO: Fesili ma Tali

1. O ai le igoa o le to'alua o Aperamo?

Tali: O Sarai

2. O fea le nuu lea na malaga i ai Aperamo ma Sarai?

Tali: O Aikupito

3. Aisea na malaga ai Aperamo i Aikupito?

Tali: Ona ua oge le nuu

4. O le a le pepelo a Aperamo na fai ia Farao ma le nuu o Aikupito?

Tali: O Sarai o lona tuafafine

A'OA'OGA:

1. Ia fa'alologo ma usita'i i le Atua o lo'o valaau mai.
2. Ia mau pea lo tatou fa'atuatua i le Atua e soifua pea.
3. 'Aua le masalosalo i lou valaauina
4. Tatou loto tetele e fai le mea sa'o

PESE: Aperamo Tama, ma lana fanau

Ua to'atele naunau, o oe foi le isi, o a'u foi le isi

E viia ai le Alii...

TATALO: Viia lava lau afi lo matou Atua e fa'avavau. Fa'afetai i lau tausiga i lo matou ola, ua matou aulia mai ai ma le manuia lenei aso. A'oa'o mai pea ia matou iloa atili au afioga ua matou fa'alologologo ai, ma ia matou savavali ai e tusa ma ou ala. Fa'amagalo i matou le fanau agasala. Amene.

IA MANUIA LE ASO SA!!

[illegible]

ASO SA ME 24, 2026 (Aso Sa Penetekoso)

MATAUPU: “O LE AGAGA PAIA” (The Holy Spirit)

TUSI FAITAU: Tito 3: 3-8

SINI: Ia a'oa'o atu i le vasega, ina ia malamalama pea i le taua o le galuega a le Agaga Paia i o tatou tagata.

MO FAIAOGA:

‘Aua lava ne’i ia te’i tatou, a ia tu’uina atu i le Atua, le viiga, le fa’amanu ma le fa’ane’etaga, ona o lona alofa ma lona fa’amaoni. O le fa’amaoni lea o le Atua, ua momoli mai ai lo outou soifua ma lo tatou ola i lenei aso fou. Malo le pale fa’afetai le onosa’i i le fa’atinoina o tiute ma faiva o lo’o feagai pea ma outou. Ia fa’amalosia pea tatou e le mana o le Agaga Paia, ma ‘ia saunia loloto ai tatou ae a la tatou galuega fai fa’atasi. O le tusi faitau lava, e nanea ai lau tapenaga ia lava le taimi e su’esu’e ai.

SINA MANATU MO LE MATAUPU:

O le Aso Sa lenei o le Penetekoso e pei ona fa’amanatuina ai e le au Kerisiano, i le vaitau lenei i tausaga ta’itasi. O le Penetekoso, o le aso na afio ifo ai le Agaga Paia i luga i a’i latou sa i ai, ma vaaia ai e le ‘au soo ma i latou uma na i ai le laulaufaiva afi peiseai ua vaevaeina, o se vaaiga mata’utia. Ae o le tatou tusi faitau e pei ona i ai le tatou mataupu i lenei taeao, ua a’oa’o atu Tito i le taua o galuega a le Agaga Paia ua fa’aalia i ai latou. Fai mai a ia, Aua o i tatou foi, sa valea i tatou anamua, ma faalogogata, ma faaseseina, sa auauna i tu’inanau ma mea eseese e fialia ai, sa nonofo ma le loto feitaga’i. A ua faaalia mai le agalelei ma le alofa i tagata o lo tatou Faaola le Atua, ona faaola mai ai lea o ia ia i tatou, e le ona o galuega o i le amiotonu sa tatou faia, a e tusa ma lona lava alofa i le faataeleina i le toefuataiina ma le faafouina e le Agaga Paia.’

Sa saunia e Iesu le faaolataga e ala i lona malii mo a tatou agasala, ua avea ai o Ia ma o tatou faaola. O le Atua sa fuafuaina ma tapenaina le galuega o le fa'aolataga, na te faamagaloina foi o tatou agasala. Sa galulue faatasi le

O me aua totoe, e faasino lea i le fa'amautaina o a'oa'oga sa'o, ma le tofia o tino matutua moa ai uma o le motu. O le galuega foi lea a Paulo i ekalesia na ia asia i ana faigamalaga. Sa le mafai ona ia nofo pea i ekalesia nei, ua ia iloa foi e mo'omia e ekalesia le ta'ita'iga mautu. O e na tofia, sa fa'amoemoeina e ta'ita'i o latou ekalesia e ala i le a'oa'oina atu o le talitonuga sa'o ma tonu, ma fa'atuputupu le au fa'atuatua ina ia matutua i la le agaga, ma fa'atamaoagaina latou ina ia ola mo Iesu Keriso, e ui i malosiaga e ono lepetia ai. Sa fa'aoga lelei e Tito lona tomai fa'ata'iat'i, e a'oa'oina ai tagata, ina ia fa'atuputeleina lo latou fa'atuatua i le Keriso manumalo. Ae o le Agaga Paia ua fa'amaligi tele ifo i luga ia i latou, ona o Iesu Keriso lo tatou Fa'aola.

GALUEGA FA'ATINO: Talanoaga

- A'OA'OGA:

- ## PESE: Le mafutaga fiafia, e le mafa'atuaioia

Le filemu le manuia, e maua uma ia te ia

MANUIA LE ASO SA PENETEKOSO!!

ASO SA ME 31, 2026

MATAUPU: “SUEGA FA’AMANATU”

TUSI FAITAU: Mataio 11:20-30, Esoto 4:1-17, Kenese 12:10-20, Tito 3:3-8

SINI: Ia fa’amanatu ai pea i le vasega, mataupu sa a’oa’oina ai o lenei Masina, ia latou iloa ai e i ai le taua o le Aoga Aso Sa.

FESOASOANI MO FAIAOGA:

Ua malo afua ailao ua maua i le alafa’i mai i lenei foi taeao fou, fa’afetai i lana tausiga i lo outou soifua ma lo tatou ola. Fa’amalo atu foi le fa’amalolosi i tiute ma faiva o lo’o feagai pea ma outou. Manatu lava o lo’o sologa lelei mea uma e tusa o le fa’atautaiga o la tatou galuega, ua tatou o’o mai foi i le Aso Sa mulimuli o lenei Masina, ua fa’amalo fai o le faiva. Ua tapena atu lava fesili o mataupu ta’itasi, a o le fa’atinoina, e taoto atu lava ia outou susuga i faiaoga mo le faiga e fai ai. A ‘ia Siaki lelei ma ia fai ni fa’ailoga mo le vasega. Ia manuia le tapenaga.

FA’ASOA MO LE MATAUPU: Fesili ma Tali

1. ‘Ia outou omai ia te a’u’ O le a le uiga o lea fetalaiga a Iesu?

Tali: O le feso’ota’iga vavalalata a le tagata ma Iesu e ala i le tatalo.

2. Aisea ua fetalai ai fa’apea Iesu e tusa ma le molimau a Mataio?

Tali: Ona o le vaitau o lo’o mamafa pulega a le malo Roma.

3. O ai tagata ia o lo’o momoli i ai le feau a Iesu?

Tali: O tagata o lo’o taotaomia ma saisaitia lagona.

4. O a ni a’oa’oga sa e maua mai i le tala sa fa’amatalaina? (tali mai lava i le mea sa e maua i lau fa’alogo)

5. I le amataga o le mataupu e 4, o le a le tali a Mose i le Atua?

Tali: O le a le talia mai ia e le nuu, aua fai mai i latou, E le’i faaali le Alii ia Mose.

6. O ai na tofia e le Atua e fai ma failauga pe fesoasoani ia Mose?

Tali: O Arona le uso o Mose

7. O le a le tofiga o Arona e pei ona ta’ua?

Tali: O le ositaulaga

8. Aisea na alu ai Aperamo i Aikupito?

Tali: Ona ua oge le nuu

9. O le a le mafuaaga na ala ai ona fai Aperamo ia Sarai e pepelo ia Farao pe a fesili ane fai i ai o ia o lona tuafafine?

Tali: Ona o le lalelei tele o Sarai ne’i mana’o i ai Farao, ona fasioti lea ia te ia.

10. O le a le uiga o le Penetekoso e pei ona fa’amanatuina e le ‘au Kerisiano?

Tali: O le afio ifo o le Agaga Paia.

Fa’afetai tele mo le galuega aemaise o le fa’ataunuuina o le tatou suega faamanatu, ia ave i le vasega le tusi faitau o le mataupu o lumana’i, o le galuega lena e fai le fale. Ia saunia se pese ma tofi se tama e fa’ai’u le vasega i le tatalo.

IA MANUIA LE ASO SA!!



ASO SA IUNI 07, 2026

MATAUPU: “O MAI NEI, TATOU MAFAUFAU” (Come now, let us reason)

TUSI FAITAU: Isaia 1: 10-20

SINI: Ia malamalama tamaiti, o le ola agasala o Isaraelu, na mafua ai le feau a Isaia, ina ia salamo ma suia o latou olaga.

FA’AMANATU MO FAIAOGA:

E vivii a’e o tatou loto i le Alii ma fa’afetaia lona silisili ‘ese, aua ana le seanoa lona alofa ma lona agalelei, tatou te le aulia mai ma le manuia lenei foi Masina. Talitonu foi o lo’o tatou maua fa’atasi lenei taeao i le manuia mai ia te Ia. Ua fa’amalo le tauata’i fa’afetai le fa’atoatoa, ua se toa lava ma outou e tusa o auaunaga eseese ua valaauina i ai lo outou soifua auauna. O le fa’amanatu lava, ia tautuana lau tapenaga, ia matua lava le taimi mo le tusi faitau e su’esu’e ai. Ia saunia outou mo le mataupu.

SINA FESOASOANI MO FAIAOGA:

O le tatou mataupu o lenei taeao, o le valaau mai le Atua e auala atu i le perofeta o Isaia, a’o le feau mo Isaraelu le nuu o le Atua ina ia salamo ma suia a latou amioga. Fetalai le Atua, afai latou te le gaua’i ma foi atu ia te Ia, o le a latou mauaina fa’amanuiaga i le eleele e ala lea i meaai lelei, ae afai latou te le usita’i, o le a faao’o atu ia i latou le faamasinoga a le Atua. Ua valaau le Atua i ta’ita’i o Isaraelu, ia latou fa’alogo i le afioga a le Atua, nai lo le faia o a latou amioga masani.

I le fuaiupu e 11 e o’o i le 15, ua fa’aalia e le Atua le le fiafia i le tele o taulaga ma tausamiga a Isaraelu, ona o a latou amioga leaga ma le le fa’amaoni. E le talia e le Atua le tele o a latou taulaga, pe a le o gatasi ma le salamo ma le fa’amasinoga tonu. O lona uiga, e faia fua mea uma latou te faia, pe a le foi i le Atua ma o latou loto ua salamo fa’amaoni. E le aoga ona o e fai taulaga i le Atua, ae o lo’o ola agasala pea ma avaga loto i atua fa’apaupau o isi malo. Le nuu na osi feagaiga ma le Atua, a’o lea ua fulitua ma galo le Atua. Ua na ona fa’alagi o lo latou Atua i o latou laugutu, a o loto ua taumamao lava. O le afuaga lea o le valau a Isaia, e omai se’i toe mafaufau ma feutaga’i ma le Atua.

Ua galo ia Isaraelu, e i ai le taimi o le fa’amasinoga tonu a le Atua, lea ua fa’aataata ma fa’ailoa i ai e Isaia, ma e taunuu lava i le taimi a le Atua e finagalo i ai. O le mea mautinoa, e le finagalo le Atua e fan olona nuu, e le tuulafoa’ia foi e le Atua lana fanau, ae a’oa’i ma fa’atonu pe a le usita’i ma faalogo. O le nuu na ia tauto ma osi feagaiga ai, na ia faia foi Tulafono e fai ma ta’ita’i tama i le olaga o Isaraelu. Peita’i, o se nuu ina ola le usita’i ma ola fa’amauualuluga i le Atua na osi feagaiga ma o latou Tama, o Aperaamo, Isaako ma Iakopo.

O le a’oa’oga foi lea mo tatou uma, ia tatou ola usiusita’i i le Atua na faia i tatou, po’o a lava mea ua tatou maua, le malosi, le poto, le tamaoiga ma isi, ‘aua ne’i o tatou manatu ai o a tatou ia. A ‘ia tatou fa’afetaia le Atua e ou mea uma ua tatou maua, ma ‘ia tatou iloa ona salamo pe a o tatou sese ma galo le Atua. E le finagalo le Atua ia tatou fano i le agasala, o le ala foi lea na auina mai ai lona Alo o Iesu, ina ia toe avatu tatou i le mafutaga vavalalata ma Ia.

GALUEGA FA'ATINO: Fesili faatupu manatu

1. O le a le mea ua tupu i le nuu o le Atua?

Tali: Ua ola agasala Isaraelu i luma o lo latou Atua.

2. O le a la le feau a Isaia mo Isaraelu?

Tali: O le valaau e omai se'i o latou mafaufau fa'atasi, ma ia toe foi i le Atua.

3. O a ni a'oa'oga taua sa e maua mai i le tala? (tuu le avanoa e tali mai ai le vasega)

A'OA'OGA:

1. 'Aua ne'i galo le Atua i lau savaliga o lo'o faia i le lalolagi nei.

2. Ia fa'amasani i le amio lelei.

3. E taua le salamo ma foi i le Atua pe a iloa ua sese.

4. E le finagalo le Atua ia tatou fano i le agasala.

PESE: #117, Pese ma Viiga

Ia saunia e le faiaoga se tatalo e fa'auma ai le mataupu.

MANUIA TELE TAPUAIGA O LE ASO SA!!

ASO SA IUNI 14, 2026

MATAUPU: "LATOU, AE LE O TATOU" (Them, not us)

TUSI FAITAU: Isaia 10: 1-4

SINI: Ia malamalama tamaiti, o ai o lo'o fa'atatau i ai le mataupu e pei ona aumai e le tusi faitau.

FESOASOANI MO FAIAOGA:

Soifua manuia ma le lagi e mama i lenei foi taeao fou, talofa talofa lava, talosia i le alofa o le Atua, o lo'o manuia i tatou uma. Malo foi le onosa'i i o outou faiva alofilima o lo'o feagai ai, ae faapea foi la tatou pitolaau faafaiaoga Aso Sa. Ua tatou aga'i atu i le si'ui o tatou galuega o le afa muamua o lenei tausaga. Silafia lava e le Atua lo outou soifua tautua ae a fanau a le Ekalesia ma le atunuu. Ia saunia pea tatou uma mo le mataupu, o le mea lea, ia lava lou taimi mo le tusi faitau ua tuuina atu e su'esu'e ai. Ia manuia le tapenaga.

SINA MANATU MO LE MATAUPU:

O le tatou mataupu o lenei aso, 'Latou, ae le o Tatou' O le tusi o Isaia, e tolu vaega o lo'o vaevaeina ai. O le vaega muamua, mataupu 1-39, vaega lua, 40-55, ma le vaega tolu, 56-66, e mafai foi ona tatou va'ava'ai i le isi itu i le faitauga atoa o le tusi o Isaia. O le tatou tusi faitau la o lenei taeao, o lo'o palasi i le vaega muamua. O se lapata'iga i e na faia Tulafono le tonu ma le pule sau a i e matitiva, ma latou faapea ai, e le maua e i latou se lavea'i mai i le fa'amasinoga a le Atua. Ua faamamafaina ai foi le matafaioi a le Atua e faaoga ai isi malo, e pei o Asuria, e faia ai faasalaga i ona tagata pe a agasala. E taua tele le vaega lenei e faamanatu ai le pule silisili a le Atua, ma le faasalaga i le amio leaga.

O le taimi ua folafola i le nuu le mea o le a o'o i ai, a'o le feau momoli lea a le perofeta o Isaia, o le a o'o le to'asa o le Alii ia te outou. Aisea? Ona ua amio leaga le nuu, ae afua mai lava ia i latou o ta'ita'i ma e pulea le nuu, ua leai se alolofa, ma ua latou faoa foi mea a e ua aumatua. O le lapata'iga mo tagata o lona nuu, latou te le maua se

Fai mai le perofeta o Isaia, se a se mea tou te faia i le taimi e faao’o ai le sala ma le malaia, tou te sosola ea ia te ai e maua ai se fesoasoani. Po’o a lava foi nisi auala tou te faia, e le mafai ona toe liliu ese ai le toasa o le Atua ma outou. O folafolaga a le Atua, e taunuu lava, e le mafai foi e se malosi ma se poto o se tagata ona suia. O le folafolaga a le Atua lea na fa’ataunuu e Isaia, o le a faatafea Isaraelu. E faaoga e le Atua isi malo tuaoi e pei o Asuria, e ave fa’atagata o taua ai Isaraelu, ina ia a’oa’i ai a latou amio, ma ‘ia latou salamo ma foi i le Atua sa o latou osi feagaiga i le amataga.

GALUEGA FA'ATINO: Fefa'asoa'a'i ma le vasega

- A'OA'OGA:**

- PESE:** Le Alii e, le Atua e,
Le fai mea e mafai.
Au galuega e lelei
Matou te ofo ai.

MATAUPU: “GALUEAINA” (Working it out)

TUSI FAITAU: Iona 4: 1-11

SINI: Ia malamalama le vasega, i le faatinoga o le ita o Iona, ma le a'oa'iga a le Atua ia te ia.

FA'AMANATU MO FAIAOGA:

Ua tatou o'o mai i le faasifoga o la tatou galuega i lenei foi vaiseuga o le tausaga, faafetai ai i le Atua sa ia tauto'alua i lo tatou vaivai i le galuega. Malo le faamalolosi, faafetai foi i lo outou taimi sa faaavanoaina, e a'oa'o ai fanau a le Ekalesia i le itu faaleagaga. E le 'auaoga le silasila a le Atua e tusa o lo outou soifua galulue ai i lana galuega, o ia foi na te fa'amanuia e tusa o lo outou tautiga. Ae le mafai lava ona tu'ua la tatou faamanatu, ina ia tautuana lau tapenaga o le vaiaso mo le mataupu. Ia mafutaina e le agaga o le Atua lau tapenaga.

SINA FESOASOANI MO LE MATAUPU:

O le tatou mataupu i lenei taeao, o le tala i le ita o Iona, ma le a'oa'iga a le Atua ia te ia. O le ita o Iona na ia tatalo ai i le Alii, e sili ai ona oti nai lo le ola. O lagona ua tutupu a'e ona o le le usita'i i le faatonuga a le Atua, e alu e ave le feau i Nineva ae sola i Tasesa. Ua toe mafaufau ane ae ua le aoga ua masa'a le ipu vai, e le mafai ona toe aoao mai. Peita'i, e le mafai ona tu'ulafoa'ia e le Atua le tagata na ia valaauina e fai ma ave feau e momoli lona finagalo alofa mo Nineva. Po'o le a lava le le usita'i o Iona, e le'i tu'ulafoa'iina e le Atua, na saunia foi e le Atua mea uma mo le saogalemu o lana auauna.

Fai mai le tala, ona alu ai lea o Iona ua nofo i le itu i sasa'e o le aai, ua ia faia foi le fale apitaga ma ua nofo ai ma mafaufau pe se a le mea e o'o i le a'ai. Na saunia foi e le Atua le kikaiona ma faasosolo i luga o lona ulu, e fai ma lavea'i i ona tiga. O le mafuaaga o le ita o Iona, ona ua le o'o le to'asa o le Atua na folafola ia Nineva. O le ala foi lea na sola ai i Tasesa, e le'i mana'o e o'o le feau ia Nineva. Peita'i, e le mafai ona sola se tasi i luma o fofoga o le Atua, e le faia foi le mea e loto i ai le tagata, ae tataua ona faataunuu le finagalo o le Atua. O le Atua foi e le faapito lona alofa, ae tutusa tagata uma na ia faia. E ui o se vaaiga faapea na atagia ia Iona, ae o manatu o le tagata, e le o le finagalo lena o le Atua.

O le valaauina o Iona e le Atua, na galue ai foi le agaga o le Atua ia Iona, a tatou mafaufau i ai, na o'o lava Iona i le loloto o le moana, o le ata o le loloto ma le ogaoga o faafitauli ma faigata e feagai ma le tagata valaauina. Ae na saunia lava e le Atua le I'a e lavea'i ai lana auauna o Iona, e le'i gata ai ae na ia lavea'i foi a'o i le vao o ia. E le'i manatu alofa Iona i tagata o Nineva, na manatu lava mo na'o ia lava, o le vaivaiga foi lea o lo'o ta'atele i nisi o tagata. E saili lava le manuia o le tagata lava ia, ae le manatu alofa ia i latou o lo'o mana'omia le fesoasoani po'o e lima vaivai ma matitiva. O le uiga lea o le fetalaiga a le Atua ia Iona, "Ua e alofa i le kikaiona, o le mea na e le galue ai, pe faatupuina; o le mea na tupu i le po e tasi, na mamae foi i le po e tasi. O a'u foi ou te le alofa ea i Nineva le aai tele, o lo'o i ai tagata e sili ona toatele i le selau afe ma afe e lua fulu."

Ioe tamaiti, o le mea ia tatou iloa, o lo’o galue pea le agaga o le Atua i mea uma tatou te faia i lenei olaga tatou te i ai. E le mafai foi ona tu’ulafoa’iina tatou e le Atua, tusa lava po’o a o tatou leaga, e le mafai foi ona tatou sosola ‘ese mai fofoga o le Atua i so’o se mea tatou te faia.

GALUEGA FA’ATINO: Fesili ma Tali

1. O le a le igoa o le laau na saunia e le Atua na matua fiafia ai Iona?

Tali: O le kikaiona

2. O le a le uiga o le upu “**ogotia**” o lo’o ta’ua i le tala?

Tali: O le sulugia i le La

3. O fea na sola i ai Iona?

Tali: O Tasesa

4. O a nisi a’oa’oga sa e maua mai i le tala ia Iona? (tali mai lava le tamaitiiti)

A’OA’OGA:

1. E le faapito le alofa o le Atua, ae tutusa tagata uma.
2. E saunia e le Atua mea uma mo lo tatou ola valaauina.
3. E taua le usita’i ma faalogo i le Atua.
4. ‘Aua le faia o tatou loto, ae fai le finagalo o le Atua.

PESE: Fa’alogo ma usita’i, e leai se isi ala

E fiafia ai Iesu pe a fa’alogo ma usita’i.

Galue ma fa’amaoni, fiafia ma olioli

E maua ai tau, e aumai e Iesu.

Malo lava fa’afetai mo le galuega o lenei Aso Sa, ia tofi ane se tama e fai le tatalo e fa’auma ai le vasega.

MANUIA TELE LE ASO SA!!



ASO SA IUNI 28, 2026

MATAUPU: “SUEGA FA’AI’U”

TUSI FAITAU: Isaia 1:10-20, Isaia 10:1-4, Iona 4:1-11

SINI: Ia su’esu’eina pea le fanau, ina ia manatua tala mai le Tusi Paia sa fa’amatalaina e faiaoga.

MO FAIAOGA:

Manatu ua fa’aifo faiva o le afa muamua o lenei tausaga, malo lava ia outou susuga i faiaoga Aso Sa le galulue ma le fa’amalolosi i lo outou valaauina. O upu lava a pe aposetolo o Paulo, ‘e le se mea fa’aleaoga lo outou tautiga.’ O le Atua lava, 32 ate fa’amanuia e tusa o lo outou soifua auauna ai i lea foi itu o le galuega. O le tatou suega fa’amanatu mulimuli lea mo le afa muamua o le tausaga, ua taoto atu lava lona fa’atinoina ia outou susuga i faiaoga. Pau o lea, ia Siaki ma togi lelei a latou suega, ma ‘ia fai ni nai fa’ailoga mo latou.

FAIGA O LE SUEGA: Fesili ma Tali

1. O le a le feau a Isaia, mo Isaraelu le nuu o le Atua?

Tali: O le a’oaiga mo Isaraelu, ia latou salamo.

2. E fia vaega o le tusi o Isaia e pei ona ta’ua i se isi vaaiga?

Tali: E tolu, vaega muamua 1-39, lua 40-55, tolu 56-66

3. O le a le mea e o'o i ai le nuu o le Atua pe a gauai ma faalogo?

Tali: O le a aai i mea lelei o le laueleele.

4. Ae fa'afefea pe a fouvale ma le usita'i i le Atua?

Tali: O le a faaumatia i le pelu, aua ua fetalai mai ai fofoga o le Atua.

5. O a ni a'oa'oga taua sa e maua mai i le mataupu sa fa'amatalaina? (tuu le avanoa i le vasega e tali mai ai)

6. O le a le mea ua tupu i le nuu o le Atua?

Tali: Ua ola agasala le nuu o le Atua.

7. A o le a le manatu o tagata Israelu i lo latou Atua?

Tali: Na manatu Israelu, e le o'o le toasa o le Atua ia i latou.

8. O le a tonu le vaega lea o lo'o i ai le mataupu e 10, lea e i ai le tala sa fa'amatalaina?

Tali: O lo'o i le vaega e lua e tusa ai ma le vaevaega o le tusi atoa o Isaia.

9. O fea o i ai le nuu i lea taimi e tusa ma le vaega o lo'o fa'aogaina mai?

Tali: Ua sauni e fa'atafea

10. O le se a'oa'oga taua sa e maua mai i lea mataupu? (o le avanoa mo le vasega e tali mai ai)

11. I le tala ia Iona, na tuu e le Atua Iona e alu ina ua le usita'i?

Tali: E le'i tu'ulafoa'ia e le Atua lana auauna o Iona.

12. O le a le umi na fa'aola ai e le Atua le kikaiona?

Tali: Na fa'atupu e le Atua i le po e tasi.

13. O a lagona na o'o ia Iona e tusa ma le mea na tupu?

Tali: E lelei ona oti, nai lo lona ola.

14. O le a le fetalaiga a le Atua ia Iona e tusa o lana tali?

Tali: Ua e alofa i le kikaiona, o le mea na e le galue ai, o le mea na tupu i le po e tasi, na mamae foi i le po e tasi. Ae te le alofa ia Nineva o lo'o i ai tagata e sili ona to'atele.

15. O le a se feau manaia sa e maua mai i le tala ia Iona? (tusi uma mai mea sa e taofi mai i le tala)

Fa'afetai tele mo le fa'ataunuuina o le tatou suega fa'ai'u, ia saunia se pese ma fai e le faiaoga le tatalo e fa'auma ai le vasega.

**MANUIA TELE LE ALO ATU MO LE MALOLOGA AEMAISE O LE FONOTELE A LE EKALEZIA
I LENEI FOI TAUSAGA. TATOU TOE FEILOA'I IA AUKUSO.**



Tautua Printing Press
1 Kanana Fou St, P.O. Box 1537
Kanana Fou, American Samoa 96799
(684) 699-9810
<https://efkas.org>